

2 Jon

Nəkwəkwə yame Jon rimirai yame ramor kiraru kin

Nəgkiarien kupən ye nəkwəkwə e 2 Jon

?Pa rimirai nəkwəkwə e? Aposol Jon rimirai nəkwəkwə e.

?Rimirai ramvən kimi nipa? Rimirai ramvən kimi niməhuak kirik, mərig Jon ramerkwaig kin nhagin, meinai ye nipig a gavman rimə tukruh narmamə kape Kughen. Ror pən in ramni nəgkiarien kureikin mimə, nəkwəkwə ramvən kimi piraovin kirik. Kini kwajikovə minə kape piroavin, iriə e nəmhuak minə.

?Narəyen rimnhawor pən iran mine nipig rimirai? Ye nipig a, nəmhajoun minə khapsaah kimnaseriwək ikin pisin pisin minə. Narmamə yamə mine kimisərig nəgkiarien kapəriə kimnhavəhsi-pən nəviginien kimi əriə, mhavəhsi-pən min napirien kimi əriə, misasitu irəriə. Mərig nəmhajoun eikuə minə kamhavən apnapig min tuk nivi-tayen nəməhuak minə, mə tuksəpəh nəgkiarien əfrakis.

?Rimirai nəkwəkwə e tuk naha? Nipig nəmhajoun eikuə minə kimnhauə, Jon rimə narmamə yamə mine kashatətə ye nəgkiarien əfrakis kape Kughen, tukasəkeiki misəpəh nəmhajoun eikuə minə a, kini misəpəh norien mine nəgkiarien kapəriə, kini mhəpəh nisasituyen irəriə. Mərig Jon rorkeikei mə nəməhuak minə tukasəkeiki misorkeikei əriə minə. In e nərgien kape Kughen.

Jon ramni mə nəkwəkwə e ramvən kimi niməhuak kirik

¹Yo elda kirik, yakamrai nəkwəkwə e, ramvən kimi piraovin^a yame Kughen rimirpen,^b mine kafan kwajikovə minə. Nəfrakisien mə yakorkeikei pik əmiə. Mərig pəh nien mə yo pisin əmə yakorkeikei əmiə, mərig narmamə minə fam e yamə mine kharkun min nəfrakisien,^c iriə min kasorkeikei əmiə. ²Kini yaksorkeikei əmiə,

^a 1:1 Niprai nəgkiarien e “piraovin” ramni “niməhuak.” ^b 1:1 1 Pita 5:13 ^c 1:1 Jon 8:32

meinai nəfrakisien raməmīr yerkitawə,^d kini tukraməmīr rerin yerkitawə.

³Pəh kisarə ye nokieiyeen mine nəfrakisien. Kini pəh Rīmtawə Kughen mine Tini, Yesu Kristo, tukaravəhsi-pə nihuvəyen mine norkeikeiyeen mine nəmərīnuyen kimi ətawə.

Pəh kitawə tuksəri-pən nəgkiarien əfrakis minə

⁴Rīkik ramagien ehuə nīpig yimnəm narmamə minə tiksīn kaseriwək ye swatuk kape nəfrakisien,^e rəmhen kin yame Rīmtawə Kughen ruini-ta kimi ətawə mə tukasəkeikei misor. ⁵Kini taktəkun ai, nowinik, pəh nien mə yakamrai nəgkiarien vi kirik kimi əmiə, məriḡ nəgkiarien əmə in e yame nakwəsəriḡ-ta apa kupən.^f Yakamni mamaiyoh mə kitawə tuksor əmə norkeikeiyeen kimi ətawə minə. ⁶Kini norkeikeiyeen e, nīpran e norien nəkwai Kughen. Kini in ramni-pə tuk ətawə mə tukasəkeikei misəri-pən swatuk kape norkeikeiyeen, rəmhen əmə kin yame nakwəsəriḡ-ta kupən.

⁷Meinai nəmhajoun eikuə minə khapsaah kwənhau-ta ye tokrei tanə.^g Iriə khapəh nhaniyeen nəfrakisien mə Yesu Kristo rimnor nīprai yermamə kin.^h Iriə a nəmeikuə minə, mine tikmir minə kape Kristo.ⁱ

⁸Ror məkneikin mə takasəriḡ əmiə pəh kwənkwaī wok kapəmiə tukrikua pik mapita. Tamə, naksəpkərhav ye kwənkwaī nəmnhawkien kapəmiə.^j

⁹Yermamə yame raməsik əpnis nhajounien kape Kristo ye nəriḡien əmə kafan, ramhajoun mə Kughen rirkək yerkin. Məriḡ yermamə yame ramraptərəkin tim tim nhajounien kape Kristo,^k Rīmtawə Kughen mine Tini, Yesu, kawəmīr yerkin.^l ¹⁰Tukmə yermamə kirik ruə tuk ik, məriḡ mīpəh nīniyeen nhajoun-atuatuk-ien kape Kristo, takpəh nini-vivi-yen in, mīpəh neighanien kin in ruə imam yerkwanu.^m ¹¹Meinai yermamə yame ramni vi vi in, ramasitu iran mamor swatuk tuk kafan nhajounien has.ⁿ

Nəgkiarien infamien

¹²Yakmə jakni-pre nəgkiarien minə tiksīn min tuk ik, məriḡ to yakpəh nivəhyen pen mirai-pən kin ye pepa. Yakmə jakurə məm əmiə, kisəḡkiar atuatuk kimi ətawə minə, pəh tukror rikitawə ramagien pik əmə.^o

¹³Kwajikovə minə kape piam,^p yamə mine Kughen rimirpen əriə, iriə kamhani vivi ik.

^d 1:2 Jon 14:17 ^e 1:4 3 Jon 1:3,4 ^f 1:5 1 Jon 2:7 ^g 1:7 1 Jon 4:1 ^h 1:7 1 Jon 2:22; 4:2,3 ⁱ 1:7 1 Jon 2:18 ^j 1:8 1 Kor 3:8; Hib 10:35,36; 11:26 ^k 1:9 Jon 8:31

^l 1:9 1 Jon 2:23 ^m 1:10 Rom 16:17 ⁿ 1:11 1 Tim 5:22 ^o 1:12 Jon 3:29 ^p 1:13 Tukmə ror “Kwajikovə minə kape piam” nīpran ramni “narmamə kape niməhuak kape Jon.”